

# 東院黃笏南中學重建 設宴暫歡別

東華三院每年都會喺酒店宴請傳媒友好食飯，不過今年就改喺旗下九龍塘黃笏南中學舉行。黨安聽校長梁志堅講，呢間係東華三院第一間創辦嘅中學，至今有52年歷史，嚟緊將會重建，2015年先起好；期間學校會暫遷大圍新翠邨辦學，臨別秋波，特邀各位在此一聚。當日新聞處處長黃偉綸亦應東華三院主席陳婉珍之邀前往捧場，另黨安亦遇潘麗瓊、屈穎妍同黃永等資深傳媒前輩。

## 東華社企食品有水準

最近黃永租用貨車搞網上電台，四圍做直播。佢同黨安講，創台目的

係希望「尋找新聞答案」，有別於一般報道啲。另外，黃永仲啱啱去完孟加拉參觀社企，佢分享話雖孟國生活貧困，但人民生活積極，令佢印象深刻。席間眾傳媒人又講起殘障狀元曾芷君嘅新聞，仲有人讚《晴報》當日（17/7）嘅報道《一段往事揭殘障狀元求職悲歌》，故事震撼感人。

難得喺學校聚餐，梁校長特別安排學校管弦樂團為大家獻奏，悠揚悅耳。原來樂團剛於歐洲青年音樂節奪獎，難怪水準咁高。此外，當日膳食亦值得一讚，由東華三院社企「iBakery」提供，食品製作、傳菜都有智障人士參與，質素不遜於往年舉辦活動嘅酒店。

賓客座位上放有寫上東華三院英文簡稱的曲奇。



iBakery供應的紅莓慕絲蛋糕及荔枝奶凍等，味道出眾。